

PARLAMENTU NASIONÁL REPÚBLIKA DEMOKRÁTIKA TIMOR-  
LESTE

**Abertura Segunda Sesaun Lejizlativa ba Segunda Lejizlatura  
Mensajen hosi Na'i Prezidente Parlamentu Nasional**

Na'i Prezidente Repúblika

Na'i Primeiru-Ministru

Na'i Eis-Prezidente da Repúblika,

Na'i Eis-Prezidente Parlamentu Nasional

Na'i Eis-Primeiru-Ministru

Reprezentante Prezidente Tribunal Rekursu

Señór Reprezentante Espesiál Sekretáriu Geral ONU ba Timor-Leste

Señór Membru sira Governu nian

Señór Deputadu sira

Embaixadores no Korpu Diplomátiku

Komandante F-FDTL

Komandante Geral Interino PNTL

Reprezentante Igreja no konfisaun religioza sira seluk

Sosiedade Sivil

Povu Timor-Leste tomak

Señora no Señór sira,

Ho serimónia solene (lulik) ida-ne'e, ita loke formal Tinan Parlamentár 2008/2009, Sesaun Lejizlativa foun ida iha Parlamentu. Iha Parlamentu ne'e, mak Poder Lejizlativu Repúblika Demokrática Timor-Leste nian. Iha Parlamentu ne'e mak diversidade no hanoin oin-oin hasoru malu ho forma saudável. Parlamentu ne'e mak forun exelénsia demokrasia nian, uma ka fatin ne'ebé próprio duni atu hala'o debate no halo desizaun ba kestaun boot sira nasaun nian.

lha Kámara ida-ne'e mak halo aprovasaun ba Lei sira no ratifika Tratadu Internasional sira. lha ne'e mak halo fiskalizasaun hodi haree katak la'o tuir Konstituisaun Repúblika no legalidade. lha ne'e mak Partidu Polítiku sira hala'o debate político importante oin-oin. Governu hato'o sira-nia inisiativa, hodi bele diskute no hetan krítika. Opozisaun bele hato'o sira-nia proposta alternativa no hatudu solusaun alternativa.

lha ne'e mak sidadaun timoroan tomak bele hato'o sira-nia hanoin ka aspirasaun kona-ba asuntu relevante ba moris nasaun nian.

Parlamentu Nasionál nia knaar ne'ebé importante tebes mak hametin instituisaun demokrática sira, hodi harii Estadu de Direitu no haburas sosiedade ida pluralista.

Nune'e, bele dehan katak iha ne'e mak Uma knuuk Demokrasia nian.

Wainhira hahú sesaun lejizlativa foun ida, sai hanesan momentu ka wain di'ak ida atu tetu kona-ba servisu ne'ebé hala'o ona no rezultadu sira mak hetan tiha ona. Nune'e mós hanesan momentu ida atu apresenta konta ba Povu Timor-Leste.

Wain di'ak ida rasik atu halo reflesaun kona-ba Parlamentu nia knaar nu'udar fatin di'ak tebes atu halo debate, halo avaliaun ba kumprimentu knaar konstitusionál Parlamentu Nasionál nian. Haree filafali mandatu mak eleitor sira deposita iha ita no relasaun ho órgaun Soberania sira seluk, entidade nacionál no Rai li'ur nian.

Iha kontestu ida-ne'e, ita labele haluha knaar fundamental mak Parlamentu Nasionál hala'o ona wainhira mosu atentadu loron 11 Fevereiru 2008 liu ba, ne'ebé Deputadu sira hala'o ho ulun malirin, tuir no kumpre lolos ba norma konstitusionál, hodi satan interesse boot tebes Estadu nian. Ho nune'e, bele hametin orden demokrática no hametin estabilidade política no sosiál. Se la iha estabilidade ne'e, ita sei la mehi ho progresu no dezenvolvimentu mak ita hotuhotu hakarak.

lha momentu difísil tebes hanesan ne'e, Parlamentu, maski independente, hatudu ninia solidariedade ho Prezidente Repúblika no Governu. Hatene duni hala'o ninia knaar tuir konstituisaun no hatudu duni nia an iha Nasaun hodi buka pontu ekilíbriu ida. Hakarak duni harii

Pás no Demokrasia, hanesan kondisaun ba sosiedade moderna no dezenvolvida. Buka fó esperansa ba ema hotu katak tempu oin mai sei di'ak liu tan.

Momentu ida-ne'e, hanesan mós momentu ida hodi ita tau objetivu no define meta sira, kona-ba funzionamentu internu Parlamentu nian hanesan Instituisaun ho nia moris rasik, hala'o servisu ba Rain ne'e. Instituisaun ida ne'ebé nakloke ba sosiedade no hala'o nia knaar ho armonia hamutuk ho Órgaun sira seluk Estadu nian.

Sesaun ida liu ba ne'e, hanesan períodu lejizlativu ida ne'ebé todan. Iha períodu ne'ebá, apresiasaun, diskusaun no alterasaun ba iniciativa lubuk boot ida. Hosi projeto no proposta lei, deliberasaun no rezolusaun, no halo aprovasaun ba diploma legal importante sira.

Ha'u hakarak mós hatutan kona-ba servisu ne'ebé hala'o ona tuir kompeténsia konstitusionál nian. Hanesan temi ona, bele haree iha Relatório Atividade hosi Primeira Sesaun Lejizlativa, ne'ebé hatudu ona esforsu notavel ida hodi harii ordenamentu jurídiku Timor-Leste nian. Iha kontestu ida ne'ebé mak ita hotu hatene katak iha limitasaun barak no iha sirkunstânsia barak ne'ebé difísil tebes.

Iha âmbitu lejizlativu no kontrolu político ne'ebé halo ona, inklui aprovasaun ba Lei sira, Rejime Jurídiku ba Estadu Sítiu no ba Estadu Emerjénsia; Finansiamentu ba Partidu Polítiku sira; halo Lei ba Períodu Orsamentu nian, halo Lei Tributaria foun, halo Lei ba Sistema Intelijénsia Repúblika nian, Lei Rejime Jurídiku ba Advokasia Privada no Formasaun ba Advogadu sira.

Iha períodu hanesan, halo ona mós apresiasaun ba proposta Orsamentu ba Períodu Tranzitóriu, ba Orsamentu Jerál Estadu nian ba tinan 2008 no ba Orsamentu Retifikativu. Sira-ne'e hotu sai hanesan objetu hosi iniciativa atus resin mak mai hosi Deputadu sira. Liu husi forma proposta alterasaun nian, hatudu produtividade aas no hatudu empeñu iha análise ba matéria sira ne'ebé ko'alia bá, nu'udar rezultadu hosi debate político-lejizlativu ne'ebé kle'an.

Iha Primeira Sesaun Lejizlativa, halo ona mós aprovasaun hosi Parlamentu Nasionál, ho forma rezolusaun nian, instrumentu oin-oin hosi Direitu Internasional nian hanesan Akordu ba Kooperasaun Téknika ho países terseirus, Protokolu Kiotu, Akordu ba Parseria hosi Estadu ACP (África, Caraíbas no Pasífiwu) no Uniaun Europeia, hodi hala'o nafatin prosesu partisipasaun Timor-Leste nian iha komunidade internasional.

Iha lidun kona-ba hametin relasaun instituisaun nian ho parlamentu no entidade Rai li'ur sira nian, ho haksolok boot mak ha'u hakarak hateten kona-ba konkretizasaun prosesu adezaun iha Uniaun Inter-Parlamentár, prosesu ida mak labele hakotu iha lejizlatura kotuk ne'e. Ida-ne'e importante tebes hodi haboot ita-nia instituisaun iha rai li'ur, hodi bele hetan benefísiu ba kooperasaun kle'an. Nune'e, bele uza hodi troka esperiénsia ho parlamentu sira seluk no iha kontaktu ho prática parlamentar sira di'ak nian. Hakarak mós ajenda ba Tinan Parlamentár 2009 sai hanesan tinan ba Dezenvolvimentu Institusionál, liu hosi aposto ne'ebé halo iha planeamento estratégiku nu'udar instrumentu esensiál atu bele hasai retornu boot hosi rekursu ema no finanseiru mak disponivel.

La haluha difikuldade ne'ebé ita hasoru, maibé iha hanoin kona-ba responsabilidade mak presiza hatudu ambisaun ba dinámika parlamentár ida foun ne'e, hodi bele halo afirmasaun tomak hosi Parlamentu nu'udar órgaun desizaun política no fiskalizasaun ba atividade Governu nian.

Atu hametin Parlamentu Nasionál nia knaar, presiza tebes duni hadi'a kondisaun atu bele hala'o ninia knaar, maibé la haluha sura ho ezijénsia oras ne'e nian.

Nune'e, tinan 2009 sei sai hanesan tinan ba *Reforma iha Administrasaun Parlamentár*, ho aprovasaun ba Lei Orgánika foun ne'ebé iha ona diskusaun, no mak sai hanesan instrumentu esensiál ida hodi halo reorganizasaun iha estrutura no prosedimentu administrativu sira. Atu nune'e Servisu sira bele fó tulun ho rigor no kualidade téknika ba Deputadu sira, hodi bele fó facilidade ba Deputadu sira bele kumpre mandatu ne'ebé eleitor fó ba sira.

Nune'e, ami hakarak fó atensaun espsiál ba Infra-Estrutura no ba

Investimentu iha Teknolojia Informasaun nian no ba Komunikasaun nu'udar suporte boot tebes iha servisu Deputadu sira-nian.

Maibé responsabilidade boot hosi knaar sira-ne'ebé Konstituisaun fó, haruka mós atu halo reflesaun kona-ba mekanizmu no instrumentu regulatóriu no regra sira ba funzionamentu rejimentál nian. Nune'e mak iha Segunda Sesaun Lejizlativa ne'e, ami sei buka ko'alia kona-ba posibilidade atu halo revizaun no hadi'a di'ak liu tan, ho hanoin atu fó efisiénsia institusionál boot ba Parlamentu.

Na'i Prezidente Repúblika

Na'i Primeiru-Ministru

Membru sira Governu nian

Señór Deputadu sira,

Embaixadores no Korpu Diplomátiku

Ha'u-nia feton no maun-alin sira,

Tinan lejizlativu mak hahú ohin ne'e, hanesan daruak hosi períodu tinan lima nian ne'ebé reprezenta kontinuasaun ba dalan ida ne'ebé seidauk to'o iha klaran no sadik ita atu hala'o servisu ida ne'ebé mak Nasaun hein, no hala'o mandatu ida ne'ebé mak eleitor sira fó.

Maibé hosi ezijénsia sira mak ita hotu hasoru iha tinan kotuk ne'e, iha kontestu mak ita hotu hatene, hatudu ona katak ita bele hakat metin no firme ho sentidu atu halo afirmasaun ba vitalidade demokrasia nian.

Iha Parlamentu mak bele debate no afirma valor ba projeto no proposta política no sosiál ida-idak. So nune'e de'it, ita bele hala'o kompetisaun política ida rasionál iha instituisaun ne'ebé reprezentativa duni ne'ebé sarani ona iha Konstituisaun.

Atu hakotu, ha'u hakarak fó saudasaun ba Deputadu sira hotu, no mós ha'u husu ba Deputadu sira-nia dedikasaun nafatin no dixiplina, iha tempu. Nune'e hato'o votu susesu boot ba ita-nia servisu, hodi bele serví ho di'ak Povu Timor-Leste mak ita reprezenta. Relatório atividades Primeira Sesaun

II Lejizlatura nakloke ba públiku.

Maromak selu.